


1818 - Uorden ni project da leschas

Viers il davos uorden, quel digl onn 1814, ha ei dau midadas minimalas. La primavera sto vegnir mess pasturs, ils pors ein d'enferrar, mirar da ver in bien pindrader, ils cavals vegnan cargai communablamein sil Tgom, la stad san ins tener a casa in pèr armauls, ils tiers dueien vegnir cargai ensemen, mintga vischinadi sto mirar per pasters da casa, annunziar ils animals che vegnan ella val, observar cun tutta atenziun ils firaus, suenter Nossadunna uost sa mintgin far fein a pastg, pèr otg dis suenter descargar ei lubiu da metter ora cultem, negin astga prender giud l'alp nuorsas senza mussar alla suprastonza, agl obercheit, quei ei aschia igl essenzial da quei uorden.

Uorden ni project da leschas d'observar en Tujetsch, igl onn 1818, ils 12 da matg



1. Duei sin mintga specia da tiers il temps dalla primavera vegnir mess pastur, cunzun sils s.h. (*salva l'honor*) tiers casa (*salvanoris*) e cauras en mises, nua ch'igl ei caschun ni prighel che tals tiers pudessen far donn.
2. Dueien ils s.h. tiers casa, il temps da primavera ed encunter igl atun, esser enferrai. Mintga vischinadi duei uardar da ver sin quels in special pindrer ed en cass ch'el pindrass tals tiers, che duessen far donn ni vessen fatg donn, duei il patrun esser obligaus da pagar agli l'emprema gada 4 x (*rizzers*) e suenter mintga gada il dubel.
3. Duei mintga vischinadi adina uardar da ver il temps da primavera e da stad in bien e sufficient pindrer.
4. Tuts uordens da stad entscheivan calonda fenadur e lura dueien era las cauras vegnir a casa tier il pastur general ni cumin; quei di dueien era las nuorsas vegnir cargadas silla **Puzza**.
5. Dueien era da calonda fenadur ils cavals vegnir cargai sut in pastur general sil **Tgom**, suenter il solit dils onns vargai. Tonaton dueien ils patrums da quels era puder duvrar quels e da quels puder sesurvir per bos e tener en quei temps mintgin sin sia pastira da casa, cun cundiziun ch'ei vegnien teni ord donn ed en cass ch'il patrun advertess ch'ei vessen il vez d'ira pils praus la notg e mettess quels buc en nuegl, sche duei el esser curdaus en castitg d'in ludeivel obercheit.
6. Duei il temps che la vischnaunca fixescha, vegnir cargau ellas alps ed ils mises da **Scharinas, Milez, Mulinatsch, Liez, Malamusa, Mila, Surprau, Valtgeva, Cungieri** e la **Val Bugnei** vegnir schubergiai taluisa, che negin duei en quels loghens puder mulscher ni caschar.
7. Tonaton duei scadin puder tener a casa in pèr armauls, quei ei vaccas ni bos, aber buca dapli.
8. Oreifer ils vadials dueien ils auters tiers vegnir cargai ensemen. S'entelli da mintga patrun.
9. Pertuccont il pastur da casa, eis ei schau sura da seregular a mintga vischinadi.
10. Essend che la vischnaunca ha pigl onn d'uonn lubiu da prender en da tuttas sorts tiers per il solit arvè, sche duei mintgin en otg dis suenter ch'el ei vegnius en cun in tier, esser obligaus da

dar en ad in um digl obercheit ch'ei il pli damaneivel. Il temps ch'igl arvè entscheiva ei ils 20 da december digl onn passau. Senza arvè duei negin en quei temps puder vegnir en cun tiers, resalvau sch'el perdess il tier ch'el vegn en, sche duei el per quel buca stuer pagar igl arvè. Vadials sut treis jamnas ein exceptuai.

11. Firaus dueien cun atenziun e cunscienza vegnir observai sco era tuts donns vegnir schurmegiai e pertgirai e tgi che vegness tgislaus da cunterfar ad in ni l'auter, duei esser curdaus sut rigurus castitg dil cumpetent obercheit.

12. Negin duei puder duvrrar uaffens per far fein oreifer il temps che la vischnaunca lai tier da segar fein a pastg. Suenter Nossadunna d'uost (15-08) duei mintgin puder far fein a pastg els loghens enconuschents sco en **Strem, Dadens ils Bauns**, etc.

13. Negin duei puder metter ora s.h. cultem entochen otg dis suenter descargar las alps.

14. Negin duei puder prender nuorsas dil pastur dallas **Puzzas** senza mussar la nota ad in um digl obercheit.


E tgi che cunterfagess ad in ni l'auter da quels puncts, duei esser curdaus en castitg dil ludeivel obercheit.



Impressiunont chischner amiez il vitg da **Sedrun**, oz **Via dil Bogn**.

1820 - Pastira da casa per Gonda e Sedrun

Denter Gonda e Sedrun ha la pastira da casa adina puspei leventau malaveglias e dispetas. Inaga dapli ha ei duvrau la sentenza davart dil cumin dalla Cadi. Cun replica e cunterreplica vegn argumentau e mintga vischinadi emprova da perschuer cun schar plidar differentas perdetgas. La sentenza croda en favur dils vischins da Gonda ed ils da Sedrun dueien puder guder mo sias atgnas pastiras tenor ils uordens da vischnaunca.



Protocols da sentenzias civilas, cudisch nr. 2, dils 8 da fevrer 1820

Secumpara signur Schmid sco procuratur dils vischins dil vischinadi da **Tujetsch/Gonda**, cun il siu cun dretg lubiu mussadur, sia sabientscha signur landaman de Latour, e meina il plogn encunter ils vischins e vischinadi da **Sedrun** sustenzialmein sco suonda.

Che a **Tujetsch** seigi fatg uorden sin mintga vischinadi, che tut temps da stad mintga vischinadi seigi obligaus da mundar las pastiras da casa e metter lur s.h. tiers egl ault per prender giu leu las jarvas, nua ch'ils vischins da **Sedrun** hagian da quei temps ch'ils da **Gonda** mettevien lur s.h. tiers casa ed auters sigl ault e per la greppa entuorn, e leu en grond prighel d'ira sutsura e per schaniar la pastira da lur vischinadi, sche han ils vischins da **Sedrun** catschau ils lur s.h. tiers casa via sin la pastira dils da **Gonda** e leu fatg pertgirar differentas gadas, nua ch'ils da **Gonda** ein vegni zun fetg engraviati, nua ch'ils vischins da **Gonda** pretendien, ch'ils da **Sedrun** hagian negins dretgs da quei possess, nun ch'ei fetschien claramein ver si quei dretg a protestien per tuts donns e cuosts che pudessen ira da quellas varts aunc pli.

Secumpara la cunterpart avon il ludeivel obercheit e suenter ha in ludeivel obercheit purschiiu amicalitad allas parts da vegnir perina tier in lugament senza far autras spesas, ei aber nuota effectuaui allas parts.

Secumpara signur statalter Laus Lombriser sco procuratur dils vischins dil vischinadi da **Sedrun** per part rispundenta e garegia mussadur signur bannerherr Balletta, ei cun dretg constenschiu, nua ch'ils vischins da **Sedrun** pretendien che quella pastira seigi ina pastira cumina, ch'ils detgs vischins hagian neginas pastiras separadas, ed aschia pretendien ei che quei seigi possess schon gudius avon dudisch onns, duront quels onns ch'ei gudevan e stau ina gada ina dispeta denter lur vischins, denton suenter ver dispitau, han ils da **Gonda** tolerau quei possess gudius entochen ussa da tut temps, nua ch'ils vischins da **Gonda** han fatg far ina visada formala, ha quella buca acceptau, e rispundiu, sch'ei veglien enzatgei, sappien ira avon, sche veglien vegnir suenter, han aber sin quella risposta tolerau e fatg negins pass giuridics, ed aschia protestien per tuts donns e cuosts che pudessen ira da quellas varts.

Replica

La part dil plogn lai valer ch'ils vischins da **Sedrun** hagian gudiu differentas gadas quella pastira, sco ei eri usitau dil temps ch'ei cargavan buca ad alp; dil temps ch'ei vegn cargau ad alp, ha mintga vischinadi ils dretgs da mundiar in toc pastira, mintgin per siu basegn. Ei

fetschien era ver si ch'ils pasturs e vischins da **Sedrun** hagian differentas gadas dumandau da puder vegnir sin quella pastira e leu pascular. Quella dispeta che stalter Giachen Wenzin da **Gonda** e stalter Florin Monn da **Sedrun** hagian giu, ei stada d'in temps ch'ei vegneva buca cargau ad alp e lura pudeva mintgin guder a siu plascher, ussa aber carghien ad alp e vegn buca tolerau.

Cunterreplica

La part dalla risposta pretenda ch'ei hagian schon gudiu avon dudisch onns dil temps ch'ei cargavien ad alp e dil temps ch'ei cargavan buc, ed aschia sch'ei muossien buca si sut tgei tetel ils vischins da **Gonda** pretendien per agen, sche pretendien ira dacheudenvia e protestan. La part dil plogn e la part dalla risposta tschentan e siaran en dretg da vegnir tier process e perdetgas.

Concediu alla part dil plogn avon, alla part dalla risposta suenter. Da part dil plogn vegn allegau per perdetga il Gion Bistgiaun Monn da **Tujetsch**, en riguard ils s.h. tiers casa Mariuschla Soliva. Suenter ver dau il sarament e fatg als sura detgs, sche depona Gion Bistgiaun Monn da **Tujetsch** che quel hagi avon dus onns fatg ina visada entras cumissiun dils da **Gonda** partenent tier quella dispeta, nua che sin quella intimaziun dils da **Gonda**, han ils vischins da **Sedrun** entras il deponent, fatg far ina cuntermisada al schon detg vischinadi da **Gonda**.

Mariuschla Soliva depona, suenter ver fatg endamen, che avon 2 ni 3 onns hagi ella pertgirau ils s.h. tiers casa sin **Gonda**, nua ch'ei seigi schabegiau che particulars da **Sedrun** hagian dumandau ch'ella duessi pertgirar era ils lur. Ella hagi detg che sche quels da **Gonda** laschien, vegli ella pertgirar e sin quei hagian ils particulars dumandau ils da **Gonda**, sco els hagian detg ad ella ed ils da **Gonda** hagian schau pertgirar, ed ella hagi sinquei pertgirau.

Da part dalla risposta depona Melcher Casparin da **Tujetsch** ed il Benedetg Deragisch. Vegn dumandau, sche vus Casperin regordies era avon 24 ni 25 onns, en **Sedrun** sin **Cadruvi**, che signur stalter Giachen Wenzin hagi detg encunter vischins da **Gonda** ed encunter stalter Flurin Monn ch'ils da **Sedrun** hagian negins dretgs da vegnir sin **Gonda** cun lur s.h. tiers casa? Stalter Flurin Monn aber hagi rispundiu ch'ei seigien adina i si cun els da quei ch'el seregordi e che sch'ei duessien esser encunter da quei, sche dueigien ira avon, sche vegli el vegnir suenter ed ei pretendien per dretgs.

Dapli depona il Deragisch e vegn dumandaus, il qual depona, che da siu seregurdar dil temps che la ludeivla vischnaunca da **Tujetsch** cargavi ad alp, seigien ils vischins da **Sedrun** adina i si **Valtgeva** cun ils s.h. tiers casa e mai silla **Val Bugnei**. Cura ch'ei cargavien buca ad alp, mavien ei sin **Val Bugnei** e buca si **Valtgeva**. El hagi buca grad adina teniu endamen. La part dil plogn pretenda, che la perdetga da part dalla risposta, numnadamein ch'il Benedetg Deragisch, possi buca dar perdetga, essend che quel seigi vischin e partischonts en quei fatg. La part dalla risposta fa era medemamein encunter alla Mariuschla Soliva e pretenda ch'ella possi buca dar perdetga, essend che quella seigi era partischonta en quei fatg.

La part dil plogn tschenta e siara a dretg, ch'ei pertendien ch'il **Hof**, ni quellas casas da **Bugnei**, seigien vischins e cuminonza cun pastiras e pasturs dils da **Sedrun** e consequentamein seigien sfurzai da part dil plogn da dumandar ina suspensiun sur da quei fatg, sinaquei ch'ei sappien secuntener leusuenter.

Ei entras „Urtheil“ enconuschiu che la damonda da suspensiun, seigi concedida, dond dretg alla part dil plogn 2 scheltadublas.

Anno 1820, ils 10 da fevrer, secumparan danovamein las sura numnadas parts, nua che la part dil plogn damonda sch'in ludeivel obercheit concedi d'ira vinavon cun la schon avon maun stada fatschenta. Ei da part dil dretg vegniu concediu la desiderada damonda.

La part dil plogn alleghescha e fa endamen sche Gionbistgiaun Monn seregordi buca ch'ils da **Bugnei** hagian ensemen la pastira cun ils da **Sedrun**?

Depona Gionbistgiaun Monn che ton sco el seregordi e sappi, hagian quels da **Bugnei** e **Sedrun** las pastiras ensemen e gaudien ensemen quellas, cura ch'ei carghien ad alp sche pertgiriens els silla **Val Bugnei** ensemen ils s.h. tiers casa e bos.

La part dil plogn tschenta e siara en dretg ch'ei seigi la questiun vertenta, sch'ils vischins da **Sedrun** possien ira cun lur s.h. tiers casa sin la pastira dils vischins da **Gonda**, dil temps ch'ei cargavien ad alp, nua che mintga vischinadi dalla ludeivla vischnaunca da **Tujetsch** ha in toc pastira aparti, ed aschia havess quei vischinadi negina pastira aparti e fussen zun fetg pregiudicai.

Els tschentien era a dretg, ch'ei hagian buca gudiu quella pastira ruasseivlamein suenter sco ils decrets da cumin ed il „Bundes Artikel“ plaida, da puder guder e stuer guder 12 onns; quei fagein nus ver ch'ei hagian buca gudiu ruasseivlamein, ed aschia garegien d'in ludeivel obercheit che quel vegni entras ina gesta sentenza a constrenscher ch'els possien guder sulettamein sco tschels vischinadis in toc aparti e che vegnien buca pregiudicai e protestien per tuts donns e cuosts che pudessen ira da quellas varts e per motiv ch'ei hagian fatg encunter a sia perdetga ier e buc pudiu ira vinavon cun la fatschenta cun protesta.

La part dalla risposta tschenta e siara en dretg ch'ils vischins da **Sedrun** hagian giu il possess schon avon 24 onns ni 25 da quella pastira, nua ch'ina gada enten ina dispeta stada denter stalter Giachen Wenzin e stalter Florin Monn e che stalter Wenzin hagi buca vuliu schar guder quei possess e fatg encunter e stalter Florin Monn hagi rispundiu ch'els hagian adina gudiu e possediu, ed aschia vegnien ei era a guder dacheudenvia e sch'ei hagian enzatgei encunter, sappien ira vinavon, veglien ei vegnir suenter cun pli. Ed aschia garegien ei cheutras ch'in ludeivel obercheit vegli entras ina questa sentenza constrenscher da puder praticar quei possess ruasseivlamein cun protesta per tuts donns e cuosts che pudessen ira da quellas varts.

Sentenzia

Suenter esser tedlau plogn e risposta, detg e cunterdetg, perdetgas allegadas, eis ei cun dretg e sentenza enconuschiu ch'il vischinadi da **Sedrun** duei puder guder mo sias atgnas pastiras tenor reglaments da vischnaunca.

Dond dretg alla part dil plogn 3 talers e la part dalla risposta 5 talers, las spesas giudizialas anteriuras restan sco las ein pagadas, las extrajudizialas salva mintga part tier sesezza. Di ed anno ut supra.

Che la copia seigi conforma al protocol da cumin attesta, **Mustér**, ils 14 d'avrel 1883, Gion Battista Carigiet, derschader circuital



Fotografia d'entorn igl onn 1910, avon la construcziun dalla viafier Furca Alpsu, oz Matterhorn Gottard. Igl onn 1913 fuvan las rodaias gia tschentadas ed igl empren tren d'emprova arriva da **Mustér** ils 4 da november da quei onn. La fotografia muossa bein il **Run** dalla **Val Ruinatsch**", el dies dil vitg da **Sedrun**. Da quel ha il vitg survegniu il num "sil run", **Sedrun**.
 Ils onns dalla erecziun dallas empremas casas a **Sedrun** fuva il **Drun/Run** dad oz aunc mo in dutg. Da quei plaida era il rapport da visitaziun dalla pleiv digl onn 1643. Per tener schetgs il territori ed il prighel da rumper ora dapli da quei run ei vegniu eregiu a **Cungieri** in dutg per trer e menar las auas vi ella val dil **Run**.
 Impressiunonta ei aunc la **Scanziala** (il crest ella dretga part dalla foto) en cumparegliaziun culla quella dad oz ch'ei surcarschida cun plontas (badugna), purschend oz in pli emperneivel e simpatic maletg pil vitg. Dretg ei gia la fin dil vitg da Sedrun cul clavau dils **Alis/Aligs**. Il hotel Alpsu ei gia vegnius baghegius igl onn 1906.